

INUIT ATAQATIGIIT INATSIARTUNI



UKA2025/161

22/10-2025

Nivi Heilmann Efraimsen

Tuluit oqaasii allamiut oqaasiini sellersatut
atuutsinneqariartornissaannut, aammalu danskit oqaasii
atuartitsinermi oqaatsitut pinngitsooranilu atuartitsissutissatut
atorunnaarsinneqariartornissaannut Naalakkersuisut iliuusissanik
pilersaarusiornissamut peqquneqarnissaannik Inatsisartut
aalajangiiffigisassaattut siunnersuut.

(Inatsisartunut ilaasortaq Jens NapãtôK', Naleraq)

Oqaaseqaat.

Siullermik Jens NapãtôK', Naleraq siunnersuutigisannut qujanaq.

Inuit Ataqatigiinniit pingaarteqaarput sutigut tamatigut siunissamilu ingerlaasissatsinni immitsinnut aallaavigaluta sinaakkusersornissarput. Aammalu ulluni kingullerni oqallittarnerni tusaasinnaavarput partiit tamarmik tamanna pingaartillugu oqaaseqartartut.

Kalaallisut oqaatsigut kinaassutsisinnut pingaaruteqarnerpaat ilagivaat. Taakkuuppullu eriageqqissaarlugit ataqquilluinnarlugit ineriartornitsinni ukkatariuagassagut. Nunarsuarmioqataanitsinni siunissaq ornitarput imaannaanngissinnaavoq, tassami uagut inuiannugit amerlanngilagut, oqaatsittalu tammariartunnginnissaat ullut tamaasa suliassaraarput.

Assersuuteqalaarlanga; aasaq Iqaluniitillunga assorujussuaq quarsaarpunga, naak ilisimagaluarlugu naggueqatitta oqaatsitik annertuumik annaanikuugaat. Tikillugit oqaloqatigalugit assut malunnarpoq tunngaviusumik oqaatsitik qanoq annaanikuutigigaat. Paasisatta ilagivaat naggueqatitta oqaatsisik ukiumut 1 % - imik annaasaraat. Oqaatsimillu nukittuumik inisseqqinnissaannut ilungersungaarlutik suliniutinik assigiinngitsunik ingerlataqartut aamma paasisatta ilagivaat. Taamaakkaluartorli suli oqaatsiminnik atuisut ikiliartorlutik.

INUIT ATAQATIGIIT INATSIARTUNI



Nunatsinni pissutit qiviarutsigit qujanavissumik oqaatitsinnik atuinerput ullumikkut ajunngitsumik inissisimavoq. Taamaattorli ullumikkut inooriasitta allanngoriartoqisup teknologillu sunniutaasa annertusiartorfiani mianersungaarluta eqqarsaqqissaarlutalu alloriarfinnik ingerlatsisariaqartugut Inuit Ataqatigiinniit isumaqarpugut.

Ukiut qulit qaangiupput Qeqqata Kommuniani aammalu Kommuni Kujallermi siullerpaamik iPad atuartitsinermut tapertatut atorneqaleqqaarmata, aammalu pissami tassani tuluit oqaasiinik kommunit ilaanni sapaatip akunneranut atuartitsisarneq tiimi ataaseq (1 lektion) 1. klassiniit 3. klassit ilanngullugit atuartitsissutigineqartalerma. Nalinginnaasumik 4. klassimiit tuluttut atuartitsineq aallartittaraluartoq.

Ukiut qulit iluanni oqaatitsinnik atuisarnitta allanngungaatsiarnera ilinniartitsisut akornganni assorujussuaq eqqartorneqartarpoq, maluginiakkat ilagivaat tuluit oqaasiisa atorneqarnerulernerat, danskillu oqaasiisa atorneqarnerisa annikinneruleriartornerat. Tamanna aamma angusatigut takuneqarsinnaavoq. Meeqqat atuarfiini inaarutaasumik misilitsinnerit inernerisa takutippaat danskit oqaasii atorlugit allattariarsornermi oqaluttariarsornermilu misilitsinnermi inerneris appariartortut.

Taakkuinnaanngillalli tuluit oqaasiisa atorneqarneruleriartornerisa ilutigisaanik Kalaallisut oqaatsigut aamma kalluarneqarput, oqaatitsinnik atuinerput allannguuteqarpoq, tamannalu sakkortuumik nakkutigeqqissaarneqarnissaa Inuit Ataqatigiinniit peqataaffigissavarput.

Una qulequtaq Tuluit oqaasii allamiut oqaasiini sallsatut atuutsinneqariartornissaannut, aammalu danskit oqaasii atuartitsinermi oqaatsitut pinngitsooranilu atuartitsissutissatut atorunnaarsinneqariartornissaannut Naalakkersuisut iliuusissanik pilersaarusiornissamut peqquneqarnissaannik imaqartoq pingaaruteqarluinnarpoq susassaqtut tamaasa suleqataatinnessaat.

Inuit Ataqatigiinniillu naqissuseqqissavarput sutigut tamatigut Kalaallisut oqaatsigut salliunneqarnissaat pingaartinneqarsigut.

Inuit Ataqatigiinniillu nalunaarusiornermi minnerpaamik IMAK, Oqaasileriffik, Kommunit, MIO, Ilisimatusarfik minnerunngitsumillu innuttaasut peqataatinneqarnissaat piumasaraarput.

INUIT ATAQATIGIIT INATSIARTUNI



Naalakkersuisut siunnersuutaat akueralugu qulaani misissorneqartussat qulaajarneqarnissaat kissaatigalugu Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut ingerlateqqinnissaa Inuit Ataqatigiinniit kissaatigaarput.